

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 37/1

29 նոյեմբերի 2016թ.

Քննարկվեց Ա/Ձ Գագիկ Մարգարյանի գանգատը ՀՀ ԿԱ ՊԵԿ աշխատակազմի իրավաբանական վարչության պետի 07.09.2016թ. թիվ 328020/11 որոշման դեմ:

Ա/Ձ Գագիկ Մարգարյանի գանգատում բերված փաստարկները.

2015 թվականի դեկտեմբերից Քաջարան քաղաքի Չարենցի 2/1 հասցեում Ա/Ձ Գագիկ Մարգարյանը (այսուհետ նաև՝ գանգատաբեր) սկսել է իրականացնել սննդամթերքի մանրաձախ առևտուր: Խանութի տարածքը 30 մետր քառակուսի է, ամսական միջին շրջանառությունը կազմում է 650.000 դրամ, միջին եկամտաբերությունը՝ 10 տոկոս:

2016 թվականի հուլիսի 7-ին Կապանի հարկային տեսչության կողմից համաձայն 1109845 հանձնարարականի Ա/Ձ Գագիկ Մարգարյանի խանութում իրականացվել է ստուգում: Ստուգման արդյունքում խանութում հայտնաբերվել է ժամկետանց դրոշմանիշով մեկ շիշ կոնյակ 2.300 արժողությամբ: ՀՀ ԿԱ ՊԵԿ իրավաբանական վարչության կողմից ընդունվել է թիվ 328020/11 որոշումը (կցվում է), որով նշանակվել է վարչական տուգանք 600.000 դրամի չափով, հղում կատարելով Վարչական իրավախախտումների վերաբերյալ ՀՀ օրենսգրքի 170.12 հոդվածին:

Չլինելով առևտրական և չունենալով իրավաբանական ու տնտեսագիտական գիտելիքներ՝ գանգատաբերը դիմել է իրավաբանական ու աուդիտորական ծառայություններին, որոնք պատասխանել են, որ վարչական տուգանքը կազմվել է օրենքի տարրին համապատասխան և այդ պատճառով չի բողոքարկել որոշումը և որոշել է դադարեցնել անհատ ձեռնարկատիրոջ գործունեությունը:

Վերոհիշյալ որոշումը որքանով է նպաստում ՓՄՁ-ի զարգացմանը ու կայացմանը, ստուգումների արդյունավետությանը և ստվերային տնտեսության վերացմանը, և այստեղ չկա արդյոք կոռուպցիոն ռիսկեր 6 ամիս աշխատող անհատ ձեռնարկատիրոջ համար:

Արդյոք իրավաչափ է 2300 դրամ արժողության ապրանքի համար տուգանել 600.000 դրամի չափով: Գանգատաբերը կարծում է, որ օրենքի նման պահանջը անհամաչափ պատասխանատվություն է սահմանում իր նման տնտեսվարող սուբյեկտի համար, հաշվի առնելով նաև այն, որ բիզնես դնելու համար վարկ է վերցրել և դժվարությամբ է սպասարկում:

Գանգատաբերը խնդրում է հաշվի առնել վերոհիշյալը, ինչպես նաև այն, որ եղել է պարտաճանաչ հարկ վճարող, օգնել անվավեր ճանաչել ՀՀ ԿԱ ՊԵԿ-ի թիվ 328020/11 որոշումը, որը հնարավորություն կտա չդադարեցնել անհատ ձեռնարկատիրոջ հետագա գործունեությունը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ նախագահի 29.06.2016թ. թիվ 1109845 հանձնարարագրի համաձայն ՀՀ ԿԱ ՊԵԿ ՕՀՎ 19-րդ բաժնի աշխատակիցների կողմից Ա/Ձ Գագիկ Մարգարյանի մոտ ՀՀ օրենսդրությամբ հարկային մարմին վերապահված իրավասությունների սահմաններում ՀՀ օրենքների և այլ իրավական ակտերի առանձին պահանջների կատարման ճշտությունը պարզելու նպատակով իրականացվել է ակցիզային դրոշմանիշների կիրառման ճշտության ստուգում:

ՀՀ ԿԱ ՊԵԿ ՕՀՎ 19-րդ բաժնի աշխատակիցների կողմից 07.07.2016թ.-ին կազմվել են արձանագրություններ «2010» թվագրությամբ ակցիզային դրոշմանիշով դրոշմավորված ապրանքի առկայության մասին: Միաժամանակ, Ա/Ձ Գազիկ Մարգարյանը հայտարարություն է տվել այն մասին, որ խանութում գտնվող «2010» թվագրությամբ 0.25լ տարողությամբ «Արարատ» տեսակի մեկ շիշ կոնյակը ձեռք է բերվել նախկինում, որը չվաճառվելու հետևանքով գտնվել է ցացափեղքի վերևի հատվածում գտնվող ապրանքների մեջ, և որի համար փաստաթուղթ չի կարող ներկայացնել:

ՀՀ ԿԱ ՊԵԿ ՕՀՎ 19-րդ բաժնի աշխատակիցների կողմից 08.07.2016թ.-ին կազմվել է թիվ 1109845 ստուգման ակտի նախագիծը, որը Ա/Ձ Գազիկ Մարգարյանը ստացել է 12.07.2016թ.-ին: Ընդ որում, ակտի նախագծում Ա/Ձ Գազիկ Մարգարյանը նշել է, որ առարկություններ չունի: Այնուհետև, 13.07.2016թ.-ին կազմվել է թիվ 1109845 ստուգման ակտը: Ստուգման ակտի 1-ին կետի համաձայն Ա/Ձ Գազիկ Մարգարյանը, խախտելով ՀՀ կառավարության 11 սեպտեմբերի 2014թ. թիվ 961-Ն որոշման 2-րդ կետի պահանջները, ք.Քաջարան, Չարենցի 2-1 հասցեում գործող մանրածախ առևտրի խանութում վաճառում է «2010» թվագրությամբ ակցիզային դրոշմանիշով դրոշմավորված 0.25լ տարողությամբ «Արարատ» տեսակի մեկ շիշ կոնյակ, 2300 դրամ գումարով: Ա/Ձ Գազիկ Մարգարյանը թույլ է տվել իրավախախտում, որը նախատեսված է Վարչական իրավախախտումների վերաբերյալ ՀՀ օրենսգրքով:

ՀՀ ԿԱ ՊԵԿ ՕՀՎ 19-րդ բաժնի 13.07.2016թ.թիվ 1109845 ստուգման ակտի հիման վրա ՀՀ ԿԱ ՊԵԿ իրավաբանական վարչության 11-րդ բաժնի կողմից Ա/Ձ Գազիկ Մարգարյանի վերաբերյալ հարուցվել է վարչական վարույթ՝ Վարչական իրավախախտումների վերաբերյալ ՀՀ օրենսգրքի 170.12 հոդվածի հատկանիշներով «2010» թվագրությամբ ակցիզային դրոշմանիշով դրոշմավորված 0.25լ տարողությամբ «Արարատ» տեսակի մեկ շիշ կոնյակ իրացնելու փաստի առթիվ: Ա/Ձ Գազիկ Մարգարյանը վարչական վարույթի ընթացքում առարկություններ չի ներկայացրել:

ՀՀ ԿԱ ՊԵԿ աշխատակազմի իրավաբանական վարչության պետի 07.09.2016թ. թիվ 328020/11 որոշմամբ ԱՁ Գազիկ Մարգարյանը ենթարկվել է վարչական տույժի Վարչական իրավախախտումների վերաբերյալ ՀՀ օրենսգրքի 170.12 հոդվածի հատկանիշներով, նշանակվել է տուգանք՝ 600.000 դրամի չափով: Ընդ որում, ՀՀ ԿԱ ՊԵԿ աշխատակազմի իրավաբանական վարչության պետի 07.09.2016թ. թիվ 328020/11 որոշմամբ առաջադրված վարչական տուգանքի գումարը Ա/Ձ Գազիկ Մարգարյանի կողմից ամբողջությամբ վճարվել է:

Ելնելով վերոգրյալ փաստական հանգամանքներից՝ Հանձնաժողովը գտնում է, որ ՀՀ ԿԱ ՊԵԿ աշխատակազմի իրավաբանական վարչության պետի 07.09.2016թ. թիվ 328020/11 որոշումն իրավաչափ է և կայացվել է ՀՀ օրենսդրության պահանջներին համապատասխան:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո թ ո շ ու մ է՝

ՀՀ ԿԱ ՊԵԿ աշխատակազմի իրավաբանական վարչության պետի 07.09.2016թ. թիվ 328020/11 որոշումը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



Վ.ՄԻՐՈՒՄՅԱՆ